

Epistolae Merovingici et Karolini aevi

Bd.: 3

Berolini 1899

München, Institut für Griechische und Lateinische Philologie / Bibliothek für Lateinische Philologie de  
urn:nbn:de:bvb:12-bsb00000539-9

#### IV.

## AGOBARDI LUGDUNENSIS ARCHIEPISCOPI EPISTOLAE.

*Agobardi Lugdunensis opera ad id tempus pleraque unico codice servata sunt, nunc Parisino 2853 (610. 4349), quem ut sospitem habeamus curae Papirii Massonii iuris consulti debetur. Ita enim ipse in praefatione operum eius Lugdunensem ecclesiam a. 1605. alloquitur non immerito corona civica dignum se aestimans: 'cum apud vos in vico Mercium libros quaererem, unaque mecum esset Stephanus Verdierus nunc mortuus, et apud compactorem librorum versaremur eius rei causa, illeque Agobardi Codicem in membranis perscriptum veteribus notis, dilaniare paratus esset, cultrumque ad eam carnificinam manu teneret, vitam illi redemimus, quod foelix faustumque fuit'. Supplentur haec verbis fratris eius, quae in prima pagina codici postea adfixa sic habentur: 'Haec Agobardi opera MS. a Papirio Massonio in lucem edita ad maiorem illius editionis fidem Bibliothecae Regiae dono dedi, ego Ioann. Bap. Massonius Regis elemosinarius Papirii frater XVI Iulii Anno Salutis Millesimo sexcentesimo Decimo octavo. Massonius'.*

*Liber ipse, quo Berolini uti liberalitate Leopoldi Delisle, summi Parisinae bibliothecae praefecti, licuit, formae quartae, nova ligatura compactus, constat 20 quaternionibus numeratis (fol. 1—179'), quibus accedunt folia 180—230 sine quaternionum numeris. Codex, nonnullis saeculi IX. manibus scriptus<sup>1</sup>, primo fol. 212 finivit, cuius pagina posterior probationes tantum pennae exhibet, ultima eius pars inde a folio 213 saeculo X. tribuenda est. Folia priora in pagina quaque usque ad f. 121' 20 versus tantum complectuntur, posteriora inde a fol. 122 multo compressius scripta 34 (postea 33) versus continent.*

*In folio primo librarius hanc rerum summam addidit: Haec insunt. Adversus docma Felicis lib. I Agobardi episcopi ad Ludovicum imperatorem. Epistola eiusdem ad eundem de insolentia Iudaeorum. Epistola Agobardi Barnardi et Faof episcoporum ad eundem imperatorem de iudaicis superstitionibus vitandis. Consultatio et supplicatio Agobardi episcopi ad proceres palatii de baptismo iudaicorum mancipiorum. Epistola eiusdem exortatoria ad Nibrium (corr. Nibridium) episcopum Narbonensem de cavendo convictu et societate iudaica. Liber eiusdem ad prefatum imperatorem ad-*

---

1) adnotationes in margine tempore posteriore additae sunt. Codicem negligentissime exaratum esse, ut Waitz contendit (SS. XV, 274), in maiorem eius partem minime quadrat.